

Bouônjour. Ch' r'est Brian Vibert tch'a l'pliaïsi d'vos présenter la lettre jèrriaise acou eune fais aniet, lé 28 dé Septembre.

Eune chose cèrtaine, ch'est qué jé n's'sai janmais célèbre philosophe et ch'est rare qué j'ai d'belles pensées qué nou pourrait împrîner dans un livre. Mais, comme minnistre licencié, nou m'a d'mandé dreinement "tch'est qu'est la pus îimportante des vèrtues bibliques?". J'hésitis auve ma réponse car j'ai tréjous considéthe les vèrtues env'loppées comme dans un fruit auve les neuf parties – l'amour (la charité), la jouaie, la paix, la pâcienche, la compliaïssance, la bouonté, la fidélité, la gentil'yesse et la maîtrise dé sé-même. Chaque vèrtu d'îimportance mais en êffet ch'est quand l'amour est en pliaiche et activement pratichi qué l's autres vèrtues suivent naturellement. Véthe-dgia, ch'est l'amour preunmiéthemment.

Saint Paul dans sa lettre ès Corinthiens nos ramémouaithe qué l'amour dèv'thait dirigi tout qué j'pensons, tout qué j'faïthons et tout qué j'disons – nos pensées, nos actions et nos patholes. Et i' nos asseûthe du pouver et l'caractèthe dé l'amour. L'amour est pâcient et compliaïssant; n'est pas envieux ou ordgilleux; n'est pas malpoli ou ambitieux. L'amour n'se marrit pon et né veurt janmais èr't'nîn autchun r'cord du tort du pâssé. L'amour né sé rêjouit pas dans l'ma ou l'îjustice mais sé rêjouit dans la véthité. L'amour protège tréjous, espèthe tréjous et pèrsévèthe tréjous.

Oh, qué l'amour sait en pliaiche et activement pratichi dans chaque îndividu tout l'travèrs du monde. Ch'est dans la Pièche Musicale qué la chanson nos dit "L'amour change tout" et j'ai hâte dé vaie dé grands changements dans notre monde déchithé où'est qu'i y'a mauvaïtchi, destruction et d'gèrre. Où'est qu'est l'amour quand j'vions les pauvres ayant à chouaïsi entre chaleu ou nouôrritthe? Où'est qu'est l'amour quand j'îngnorons les cheins tchi sont en détresse? Où'est qu'est l'amour quand i' y' a ment'tie ou vol'lie? Où'est qu'est l'amour quand l'vaïsin attaque san préchain auve un couté et l'tue? Et en chute période même où'est qu'est l'amour dans les nombreux pays en dgèrre ou en dgèrre civile? Est-che qué j'avons compliètement oublié d' aimer nos ennemîns!

L'amour change tout et ch'est en découvrent et sachant qué not' Créateu Dgieu nos aime et est la source dé ch't amour qué j'pouvons aller auve mains ouvèrtes pour èrchéver dé Li. Et j'aimons car l' nos a aimé d'abord.

Et bein, ch'est là tout pour aniet. Ayiz tous eune bouonne journée et eune bouonne semaine auve amour abondant.